

Samgöngu- og sveitarstjórnarráðuneyti
Sölvhólsgötu 7
101 REYKJAVÍK

Reykjavík, 14.8.2020
Tilvísun: 20200801114

Kt. 580417- 0780

Umsögn um drög um reglugerð um skráningu einstaklinga – mál 121/2020 á samráðsgátt stjórnvalda

Ríkisskattstjóri hefur ákveðið að taka til umsagnar drög samgöngu- og sveitarstjórnarráðuneytisins, dags. 24. júní sl., sem birt voru á samráðsgátt stjórnvalda þann 25. s.m. að reglugerð um skráningu einstaklinga, sbr. 23. gr. laga nr. 140/2019, um skráningu einstaklinga.

Ríkisskattstjóri telur tilefni til eftirfarandi athugasemda við eftirfarandi ákvæði reglugerðardraganna:

8. gr. - Kerfiskennitöluskrá

Ríkisskattstjóri bendir á að afar ákjósanlegt væri að í kerfiskennitöluskrá væru skráðir komudagur til landsins og brottfarardagur. Þessar upplýsingar myndu einfalda til muna skattlagningu aðila á kerfiskennitöluskrá, en hingað til hefur skattlagning þessara aðila (nú aðila á utangarðsskrá) í of ríkum mæli verið handvirk sökum skorts á upplýsingum um dvalartíma viðkomandi. Það yrði miklum mun til bóta ef að unnt væri að vélvæða frekar skattlagningu þessara aðila á grundvelli skráðra upplýsinga um dvalartíma í nýrri kerfiskennitöluskrá.

Þá telur ríkisskattstjóri mikilvægt að skerpa á því til hvaða upplýsinga stafliðir f.-j. vísi, en óljóst er hvað varði aðsetursupplýsingar á Íslandi og hvað lúti að lögheimilisskráningu í heimaríki. Mikilvægt er að heimilisfang viðkomandi á Íslandi komi fram, sem og póstnúmer og skattskylt sveitarfélag, til að tryggja að útsvarsgreiðslur skili sér með réttum hætti til hins íslenska sveitarfélags.

Þá bendir ríkisskattstjóri á að það er algjört lykilatriði að fullnægjandi tenging verði á milli eldri kennitölu (ef við á), nýrrar kerfiskennitölu og síðar hefðbundinnar kennitölu í tilvikum þar sem einstaklingur fær fulla skráningu í þjóðskrá í kjölfar skráningar á kerfiskennitöluskrá. Skattyfirvöld grundvalla í mörgum tilvikum störf sín á upplýsingum sem varða margra ára

tímabil, og algjörlega óviðunandi hlyti að teljast ef að það hefði áhrif á réttleika skattlagningar einstaklinga að þeir hafi á einhverjum tímapunkti verið skráðir á kerfiskennitöluskrá.

17. gr. – Miðlun heildarskrár þjóðskrár

Ríkisskattstjóri bendir á að misritun virðist hafa orðið í b-lið þessarar greinar, þar sem í reglugerðardrögum er vísað til „skattstjóra“ en embætti skattstjóra voru lögð niður árið 2010. Réttast væri að þessi stafliður vísi til stofnanaheitis en ekki starfsheitis viðkomandi embættismanns, sbr. t.a.m. vísun c-liðar til Tryggingastofnunar ríkisins og d-liðar til Sjúkratrygginga Íslands. Í tilviki skattyfirvalda er þar um að ræða stofnunina Skattinn, og eðlilegast væri að til hennar væri vísað í greindum b-lið.

Virðingarfyllt,
f. h. ríkisskattstjóra


Elfr Alma Arthursdóttir


Helga Valborg Steinharsdóttir